

И. 59

28032

ИВАН ИЗЬЮРОВ



Мичман Тришкин

КОМИ КНИЖНОЙ ИЗДАТЕЛЬСТВО • 1967

ИВАН ИЗЬЮРОВ

Мичан Кижинь

ШӖР АРЛЫДА
ЧЕЛЯДЫЛЫ
ПОВЕСТЬ



Каше книжной
издательства
1 · 9 · 6 · 7

БИБЛИОТЕКА
Респ. Краев. Музея
Ном. АССР

Изъюров И.

Миян Бикинъ

С

и 39.

«Миян Бикинъ» повестьсö писатель Иван Изъюров гижис шöр арлыда челядылы лыддьöм выльö.

Повестяс висътавсö Керöсдор сиктса челядь йылысь, кодъяс лоисны медся первой пионеръясöн асланыс сиктын. Тайö лон кызьöд воясö. Медся активнöй пионернас вöли Саня Кынев, кодлы ёртъясыс сетисны мича ним. Сийöс ас костас кутисны шуны Бикинъöн. Тайö жö нимнас сийö кырымавлis газетнöй заметкаяс, кодъясöс ыстывлis Сыктывкарö.

Водз пöгибнитis Саня Кынев: сылы сэки вöли сöмын 14 арöс. Но сийö олö сьöлöмъясас, паметяс налöн, кодъяс тöдлisны сийöс. Выль йöз быдмöны Керöсдор сиктын. Выль олöмöн олöны найö. Но и выль йöз тöдöны Саня Кынев йылысь. Сидзкö, накöд сийö, миян Бикинъным.

7-6-3

71.67 М



Саня Кынев!.. Ичӧтдырся дона друг менам!..

Ме век казътывла тӧнӧ, кӧть талун мянӧс торйӧдӧ
ӧта-мӧдсыным сы мында во. И мыйӧн лоӧ сьӧкыд-
джык, ме пыр думысь юала ассьым: «А кызди эськӧ
та вылӧ видзӧдліс Саня Кынев? Мый сійӧ мӧдіс вӧчны
ме местаын?» И зільлі вӧчны сідзи, кызди эськӧ, ме
думысь, вӧчис Саня.

Казътывсьӧны Великой Отчественной война вояс.

Тайӧ вӧлі Карельской фронт вылын, войвылын.
Миян батальон водзӧ сувтӧдісны мог: пырны против-
никлӧн тылӧ, жугӧдны сылысь опорной гарнизон
ыджыд ты боковысь.

Но противник казяліс мянӧс водзджык, эз лӧдз
матыстчыны ты вомӧныд гарнизон дінӧ. Ковмис бӧ-

рынътчаны. Туй вöлі сьöкыд. Ми ас выланым кыским ранитчöм ёртъяснымöс, боеприпасъяс. Он öд шыбит: быд здукин вермас ковмыны. Бур ещö, кутшöмкö гөгөрвотöм помка вöсна противник эз вöтчы миян бöрся. Вермис эськö ыджыд лёк вöчны батальоны.

Туйын миянöс суис вой. Арся войыд войвылад — дзурс пемыд, ас бöрсяыд мунысь ёрттö он аддзы. Быдөн жуялим, эбöсьяс дзикöдз бырины. А шойччөг оз сетны: войся пемыднас быть коліс воöдчыны асланым позицияс вылö. Унаысь воліс дум: водны уль му вылас, мыйкö дыра кежлö кöть нюжöдчыштлыны, ойбыртлыны, чукöртны вынъяс. Мед кöть сэсся ёртъяссьыд колян. Но сэки быттьö друг кылі Санялысь гөлөссö:

— Эн сувт! Эн кольчы ёртъяссьыд!

И кысь сöмын вынöй бөр чукөрмыліс!

И эг на öтчыд сійö сьöкыд воясас ме кывлы Санялысь гөлөссö. Быттьöкö мекöд орччөн пыр сулалö, аддзö менö, тöдö, кутшöм меным сьöкыд.

Саня вöлі медся визув миян сиктса зонъяс пöвстын. Мыйөн кöть он кут венласьны — котралöмөн, чеччавны, паличөн кыскасьны, мачөн ворсны,— сійö пыр медся водзын да медся тэрыб. А сідзсö öд жебиник. Синъяс-ыс лөзöсь, гырысьсöсь, нывъяслөн кодь рамöсь. Но быдөн вылö видзөдöны веськыда, повтөг, кызди пыр овывлө сөстөм сьөлöма йöзлөн. И некод эз лысыт сійöс ылöдлыны, миянлысь Санянымöс, ни ми, сьлөн другъяс, ни кодкö бокöвöй морт. Пыр и казялас да ёна янöдас.

Кутшöма тэ он тырмы талун, миян челядьдырся друг да юрнуöдысь! Нюмъялыштін эськö важ мозыд, гажаа гизин-сералін да шмонитін, кызди сэтшöма кужлін тэ öтнад. Тэ эськö и öні миян пöвстын вöлін медся авъя-өн, медся вежöраөн.

**САНЯ КЫНЕВ КӨСҮӨ ЛОНЫ
ЗЕМЛЕМЕРӨН**

Миянлысь Керөсдор сиктнымөс куим пельё юкёны кык шор. Шоръяс костыс шусис Вичкодорөн сы вөсна, мый тані сэки сулавліс вичко, а помъясыс — Катыдпомөн да Қытыдпомөн. Вичкоыс важөн абу, а нимыс өнөдз кольёма.

Ми Санякөд олім Қытыдпомын. Сикт өтар помсянь мөдөдзыс матө куим километр, но тайё эз мешайт миянлы быд лун котравны сикт мөдар помө. Гожөмын сэсянь матынджык Эжва дорө купайтчыны лэччывны, а төвнас миянөс қыскис Катыдпом аслас джуджыд керөсөн, коді вөлі дзик грезд бокас. Тайё керөс йывсяныс ми иславлім лямпаөн. Ок, кутшөм лөсьыд! Йөткыштчан, уськөдчан мый вынсьыд чой горув, и Эжва дорөдз шутөвтан! Коді усьө мыш вылас, коді кыр шөрас патурликсяс, а ми Санякөд пыр помөдзыс кок вылын. Сэсся выльысь каям кыр йылө, мөдысь исковтам, коймөдысь... Тадзи лунтыр. Кодсюрө мудзасны да энөвтчасны, весиг гортаныс пышъясны, а ми Санякөд медбөръяөдз ислалам. Майбыр, мам ни бать гортө пырны оз чукөстны — ылынөсь.

Зонпоснияскөд орччөн пыр котраліс и Лиза, миянкөд тшөтшъя нывка, коді нинөмөн эз көсйы кольччыны детинкаясысь: лямпаөн ислалігөн и гожөмын купайтчигөн. Некодөс нывкаяс пөвстысь мукөдөс эг сибөдөй, а Лизаөс эг тойыштөй ас дінысь, мед көть сійө и вөлі катыдпомса. Код төдас мыйла. Дерт, көнкө, збойлуныс

да пельклуныс вѳсна. Сэсса некор эз бѳрдливлы, кѳтъ кутшѳма доймас, либѳ детинкаяс ѳбидитасны.

Лизакѳд ми велѳдчим ѳти классын вичкодорса школаын, весиг пукалѳм ѳти парта сайын. И кѳтъ вѳлі кутшѳма он чепѳльт урок вылад, некор оз норась учительды. Вот та вѳсна ми и сибѳдѳм Лизаѳс ас дѳно. Ѳтноссѳ уна дас нывкаяс пѳвстысь.

Но вѳлі, тыдалѳ, и ещѳ ѳти помка та вылѳ. Лизалѳн вокыс, Егор Казаков, вузасис Вичкодорын кооперативнѳй лавкаын да вѳлі сиктса комсомольскѳй ячейкаын секретарѳн. Таысь кындзи, Егор миянлы унаысь ки тырнас сетльвлѳс кампет либѳ ѳрешки, и сэки нюмьялѳмѳн шульвлѳс:

— Смотри, менсым чойсѳ вѳрѳ эн воштѳй...

А мыйла миянлы вѳрас Лизасѳ воштыны!

Челядьдырся олѳмыд — тѳждысьтѳм да водзѳ йылысь думайттѳм кад. Котрав школаѳ, кывзысь батьмамыдлысь, ислалѳгѳн эн чег коктѳ, а кѳдзыд дырйи эн кынты ныртѳ, — со и ставыс, мый сэки колѳс тэсянь. Кынѳмыд пѳт картофельѳн да паренчаѳн, паськѳмыд кѳтъ омѳлик да кутшѳмкѳ ѳшалѳ жѳ пельпом вылад. А кѳмавнытѳ и ыджыдджык вокыдлѳн дѳмаса гынкѳмыс шогмас. Мед ыджыдджык кѳ, зато шоныд.

Олѳмыд сэки сиктад мунѳс лѳня. Ѳти лун омѳля торъялѳс мѳдысь. Миян сиктын медся ыджыд вельторѳйѳн сѳйѳ кадас вѳлі клуб восьтѳм. Клубсѳ восьтѳсны комсомолецъяс Яран Паш керкаын.

Вичкодорын тайѳ Яран Павелыслѳн грывидзисны кык керка. Мѳдсѳ стрѳбитлѳма ыджыд пиыслы. Сѳйѳ вѳлѳма унтер-офицерѳн царскѳй армияын, бѳрвылас мунлѳма еджыдъяс дор, кор найѳ кайлѳмаѳсь Эжва кузя. Павеллѳн пиыс сѳдзи и абу волѳма гортас, и велькеркасѳ сылысь том йѳз босьтѳсны клуб улѳ.

Ок, ёна и скöраліс Яран Паш! Но гыжъясыс сылөн сэки вöлі тшöтшыдöсь нин, абу важъяйд, кор кöзяинөн Керöсдорын вöлöма. Мый кöсйылöма — сійöс и вöчлöма. Сылөн магазинын жö вузасис и кооперативнöй лавка. Пашлөн вöлі ещö ичöтджык пи, Зöся, сійö велöдчис карын.

Ми, сиктса челядь, луннас школаынöсь, а рытгурувнас чукөрөн-чукөрөн даддьөн да лямпаөн исласям, сэсся клуб гөгöрын шыалам. Клубас мянöс лэдзлісны зэв шоча, зато клуб гөгöрыс лымсö южöдз талявлім.

Санялөн батыс, Афанасий Васильевич, коммунист, партячейкаса секретарь. Афанасий Васильевич сой пöла. Шуйга кисö шашкаөн керыштлöмаöсь, кор воуйтöма Будённйлөн конницаын. И тöлын и гожöмын юр вылас новліс сійö ёсь йыла да гöрд звездаа будённовскöй шлем, ветлöдліс унджыкыссьö важ салдатскöй кузь щынеля. Миянлы сійö унаысь петкöдліс эзысь табак доз, кодöс сылы пöдаритлöма ачыс Семён Михайлович Будённй.

Сиктса школа помалöм бöрын Саняöс батыс мөдöдіс велöдчыны Сыктывкарö. Тайö сідз жö вöлі вельтор сиктса олöмад: сыöдз Керöсдорысь карад велöдчылісны сöмын отеч Никодимлөн да Яран Пашлөн челядьыс.

— Висьтав кöть, мыйö велöдчан карад?— завидьпырысь юасьлім ми Санялысь, кор сійö первой тулыснас воис каникул вылö.

— Нинöмö на ог,— висьталіс Саня.— Прöста велöдча.. Второй ступеньын.

— Весиг учительö он во?— шензим ми.

— Учителявнытö позяс... А ме кöсья мунны Москваö велöдчыны землемерö...

— Землемерö?.. Тайö нö мый, му мерайтны?— эг гөгөрвоёй ми Санялысь кöсйöмсö. Керöсдорö воліс

воддза вонас землемер: турун кодь веж картуза, югыд кизьяса. Важон пö татшöм паськöмсö карса служащöй-яс сöмын новлöмаöсь.

— Мусö ставсö колö бура мерайтны да выльысь юклыны,— висьталіс Саня.— Бать шуö: мырддям Яран Павеллысь да поплысь бур муяссö, машинаяс лöсьöдам да коммунаөн öтвылысь мöдам овны... Тадзи пö Ленин тшöктöма.

Ленин!.. Ми тöдiм: сійö сетіс выль олöмсö, вöтліс озыръясöс. Со и миян Керöсдорын Яран Павеллөн выль керкаыс клуб улö вуджис. Выль школа со лöсьöдчöны стрöйтны. Но Лениныд тöвнас кувсис.

Кымын выль кывйөн тöдмöдiс миянöс Саня!.. Кутшöм книгаяс вайліс карсыд, выль сыланкывъяс... Сэки ми первойысь тöдмасим коми писатель Нёбдiнса Витторлөн мича гижöдъясөн.

— Колö и миянлы пионерьясö ставнымлы гижсьыны,— висьталіс ещö Саняыд.— Карад найö эмöсь нин. Гöрд галстукаöсь, öтвылысь ворсöны да велöдчöны... Ме вот батькөд та йылысь сёрнитла. Ачым ме пионер нин тöвсяньыс...

А сэсся лои сійö, мый йылысь сиктын öнöдз казтылöны... И оз позь не казтывнысö.

Мöд глава

СИКТ КУЗЯ ВОСЬЛАЛÖ ОТРЯД

8 Öти гожся лунö вичкодорсаяс аддзисны ньöтчыд вöвлытöмтор: туй шөрöд, кык визьö сувталöмөн, муниципалны зонпоснияс да нывкаяс, гораа сьылісны. Гашкö,



морт кызь. Морös вылас быдöнлөн ломзис яр гöрд галстук. Челядь мунисны збоя, юрнысö вылö лэптöмөн. Медся водзын вöсьлаліс Саня Кынев да гораа шуаліс:

— Ать-два... Ать-два...

Зонпоснияс да нывкаяс вöсьлалісны кокысь кокö, велöдöм салдатъяс моз. Мунысьяс лыдын вöлі и Лиза Казакова, а сыкөд орччөн вöсьлаліс отеч Никодимлөн пиыс — Коля Тюрнин.

— Видзöдтö, поплөн пиыс накөд!..— кияссö бокас паськыда шлапкөмөн, кылö, шуис улича бокын сулалысь пöчö да чöвтіс ыджыд пернапас.— Му вежöмыд, тыдалö, збыльысь матысмö!.. А перна, дерт, некодлөн абу. Мед сэсся найöс, мутиясöс, та бöрын ен оз накажит!..

Ме ачым мунысьяс радын жö вöлі, и öні на ог вермы висьтавны, мый вöчсис мян морöс пытшканым, кутшöм радöсь ставным вöлім.

Гөгөрвоана, мянлысь пионерскöй отрядсö котыртысьöн вöлі Саня Кынев. Сійö чукöртис öтчыд мянöс сикт сайö неылö öти сөнö да висьталіс отряд котыртöм йылысь. Кутам пö öтвылысь походъяс вöчавны, вöрын бипур дорын узылыны, отсасьны коммунистьяслы да комсомолецъяслы. Висьталіс пионеръяслөн законъяс йылысь: отсасьны быдлаын öта-мöдлы, овны öтвылысь, бура велöдчыны.

— Ме лоа тiян командир, пионеръяс ногөн — жожа-тöй,— висьталіс ещö Саня.— Ковмас менсьым кывзысьны, кыдзи командирлысь.

— А тэ кодлысь мöдан кывзысьны?— шы сетіс кодкö.— Мый кöсьян — сійöс и вöчан?

Кутшöма видзöдліс Саня тайö кывъяссö шуысь детинка вылö!

— Оз кö кажитчы — верман мунны,— вочавидзис сылы Саня.— Ленинскöй пионеръяс олöны ленинскöй комсомол юрнуöдöм улын, сылысь и мöдам кывзысьны быдторйын. Он кö тайöс гөгөрво, нинöм мянкöд öтвылысь овны...

— Ме... ме öд прöстö юалі...— дорйысис зонка.— А то и...— видзöдліс сійö Коля Тюрнин вылö да ланьтис. Саня бара уськөдчис зонка вылö.

— А мыйла сійö оз вермы лоны пионернас? Коля — мян кодъ жö школьник. Батьыс мед ылöдлö енлы эскысьясöс, а Коля лоас пионерөн. И мед быдөн аддзöны: Коля — мянкөд...

— Тадзитö и Зöсяöс позяс пионерад гижны!— шуис кодкö мöд.

— Зöся — мöд делö...— Саня бергөдчис Колялань,

кодi сулалiс неылын, шуис сылы:— Сöмын мед вичкoö ветлöм эз вöв. И пызан сайö пуксигöн пернапас эн чöвтав. Пионеръяс — безбожникъяс. Верман вöчны?

— Верма...— вочавидзис Коля.

Колö висьтавны: Коля велöдчис карын öти классын Санякöд. Унджык на таысь: найö вöлины другъясөн. Коля талялiс Санялысь дзык быд кок туй. И миянлы тайö вöли гөгөрвотöм: мыйла Саняыс сiдзи сибöдö ас дiнас поп писö, а ачыс кöсйö велöдчыны землемерö, мед мырддыны отеч Никодимлысь муяссö. Но Саня ассыс визьсö кутiс чорыда.

Миян отряд йöз водзö эз на петав. Ми чукöртчыв-лим Эжва бокса неыджыд вөр дiын, сэни велöдчим строй-өн ветлыны, сывны сьыланкывъяс. Афанасий Васильевич да Егор Казаков частö воывлiсны миян дiнö, висьтавлiсны Ленин йылысь, коммунистьяс йылысь, комсомолецьяс йылысь.

Воис кад и ми ю бокысь кайим сиктö да мунiм улича кузя стройөн. Кутiм отсасьны комсомолецъяслы стеннöй газет лэдзны, собраниеяс вылö йöзöс чукöртны,— сöмын чукöст. Оз, майбыр, ков унаысь тшöктöм.

Коймöд глава

БИКИНЬ

Öти мича гожся лунö ми став отрядөн вуджим паськыд Эжва сайö. Луныс лөнъ, юлөн веркöсыс оз вөрзъыв, югъялö стеклö моз. Кöть сувт да котöрт сы кузя. Кажитчö, кокыд эськö оз кöтась. Шондi сотö пöся, жар. 11

Кутшом лосьыд татшом луннад туплясыштны пось лыа вылын, купайтчыны шоньд ваын.

Пось лыа вылө разөдчөм бөрын (зонкаяс да нывкаяс торйөн) Саня чукөстис менө, нуөдис бокө. Көть кутшом эз вөв окота ылыстчыны ва дорысь, ме муні.

— Сёрнитны колө,—вашнитис Саня да кыпөдліс гырысь лөз синъяссө ме вылө. Тадзи сійө пыр вөчліс, кор лөсьөдчис висьтавыны мыйкө гусятор.— Но мед некод оз кывлы, сійөн и кори ылөджык. Купайтчыныто удитан на...

Сой пөлөд Саня кыкис менө бадьяс сайө, сэся ещө водзө — веж луд вылө.

Нюжөдчим. Вывсянь жар сотө, увсянь муыс шонтө. Гөгөр мича дзоридзяс. Турун пөвстын шыалөны чиркьяс. Лэбалөны мича бобувьяс. Ме эг нин жалит, мый локті татчө, но чөв олі, виччыси, кор Саня восьтас ассье гусяторсө.

Сэки Саня кыкис зепсьыс нейджыд бумага лист, мыччис меным да шуис:

— Вот мый меным төрыт Коля вайис...

— Тюрнин?—юалі ме да босьті бумагаторсө, паськөді. Сэні гырысь шыпасьясөн вөлі гижөма:

*«Дугдөй пионералөмсьыныд, а то бур оз ло.
Кыкысь мед оз ков тишөктыны».*

Некутшом кырымпас эз вөв. Ме гөгөрвотөма видзөдлі Саня вылө, юалі:

— Коді, чайтан, гижө?

— Мыйөн ме төда? Коля висьталіс: сюри пө кильчө помысь — и ставыс.

— Ме ногөн, Зөсима кындзи некодлы...

— Кыыс абу сылөн... Дай абу сэтшөм йөй Зөсяыд.

— А мыйла эськө сідзи миян вылө лөгалө?

— Мыйла керканысö налысь мырддисны. Мыйла батыслы вузасыны оз сетны,— Саня матыстчис мелань, видзöдліс гөгөр, бытбөкө кодкө миянөс вермис кывзыны, мөдіс вашкөдны:— Тэ төдан: батыс Зөсьылдлөн көнкө дзебасын уна зарни видзө. Карын Зөся ачыс ошйысьöма Колялы. Вот эськө, адзыны сійö зарнисö!

Ме кывлі жö Яран Пашлөн зарни йылысь. Войдөр Павелыс вөвлöма зэв озыр. Аслас магазин сиктын. Мөс видзлöма витөдз. Вөв пыр кык, а то и куим. Быд гожом сы ордын уджавлöмаöсь медавлөм йөз. Бать на меным унаысь висьтавліс, кызди Яран Павел некымынысь бөбөдлöма сійөс прöмыс ньөбигөн.

— Вай нöйтам Зөсясö!— друг артмис менам.

— Йöй тэ! А мый тайö миянлы сетас?

— Повны мед кутас. А Коляыс, чайтан, абу öтвылысь ськөд? Зөсяыс на ордö волевлө.

— Коля абу кык бана шаньга!— дорйис другсö Саня.— Тэ чайтан, зэв кокни сылы пызан сайö пуксьыны пернапас чөвттөг? Адзылін эськө, кызди мамыс сы вылө видзөдлывлө... А вот батьясныс öтвылысь. Гожомбыд чери кыйöны öтлаын. Помчаасьöны...

— Мед Коляыс кыйöдас да төдмалас, мый найö ас костаныс сёрнитöны чери кыййгас...

Саня бара бергөдчыліс мелань, видзөдліс сюся, мыйкө йылысь думыштчис да шуис:

— Абу лөсьыд Колялы тайөс тшөктыны...

— А ме ачым кыйöда найөс да кывзыся,— збоя вөййыси ме.— Мый нө ме, тайөс вöчны, чайтан, ог вермы? Ещö кызди...

— Ок, йöй тэ!— серөктіс Саня.— А гашкө налөн ставсö нин важөн сёрнитöма...

И көть кызди ми эг зильöй, нинөм думыштны эг вермө. Öти ног көсьям, мөд ног — оз артмы.

— Вот эськӧ...— кымынӧдысь нин выльтор думыштлі ме, но Саня сӧмын серамвыв лэптас.

— Ок, тэ! Пинкертон!

Ме лыддылі нин тайӧ Пинкертон йывсьыс, кодӧ вӧвлӧма свет вылас медся сюсь сыщикыс. Саня жӧ вайліс книгасӧ карысь. Ӑні тайӧ книгасӧ, пӧжалуй, отрядын быдӧн нин лыддисны. И, тӧдӧмысь, быдӧн кӧсйисны лоны сы кодъ сюсьӧн.

Сэсся Саня суйліс кисӧ гач зептас, кыкис сӧсь выль бумага лист.

— Со менам ещӧ мый... Лыдды...

Ме босьті гижӧдторсӧ, паськӧді. Лист вылас ярскӧб посныдик шыпасъясӧн вӧлі гижӧма:

«Дона Бикинь ёрт! Тэнсьыд кывбуръястӧ лыдди. Вескыда висьтала: абу на артмӧмаӧсь, зэв на жебӧсь. Ёнджыка частушкаяс вылӧ муноны. Но ӧд и частушкаясыд зэв буртор жӧ, оз на быдӧнлӧн артмыны, а бур кывбуръяссӧ велалан на гижны. Уджав водзӧ, том друг, велӧдчы, лыддысь ёнджыка. Кымын уна книга лыддян, сымын унджыктор гӧгӧрвоан, унджык мӧдан тӧдны.

Карад воан да эн дышӧдчы аддзӧдлыны менӧ. Сэки став йывсьыс бура сёрнитам.

12/VI-24 во.

Топыда кутла китӧ да сия быд бурсӧ.

Нёбдінса Виттор».

Ме лыдди гижӧдсӧ мӧд пӧв, выльысь видзӧдлі Саня вылӧ.

— Мый тайӧ?— юалі гӧгӧрвотӧг.— Коді тадзсӧ гижӧ?

14 — Кырымасьӧма тай: Нёбдінса Виттор.

— Ачыс? А Бикинъыс кодї?

— Бикинъыс — мел— ошйысьбөмөн моз вочавидзис Саня.— Гуся ним сійө менам. Псевдонимөн шусьө рочнад. Со Горький — Максим Горький. А збыльвылас сійө Алексей Пешков. Либө Нёбдинса Виттортө босьт. Збыльвылассө сійө Виктор Алексеевич Савин. Ме сійөс карын, гашкө, дасысь аддзылі. Спектакль видзөдї. Витторыс ачыс ворсіс. Ок эськө, аддзылін кө тэ!

Ме синъясөс паськөдөмөн видзөдї Саня вылө: вот вөлөм сійө кутшөм! Кыдз нө та бөрын он любит сійөс. Дерт, меным сы кодьөн некор не вөвлыны.

— Но тэ некодлы кыв ни джын...— велөдїс менө Саня.— Смотри! Мед дзик некод тайөс оз төд. Сөмын тэ да ме. Тайө лоө мян тайна... Верман кутны кывтө?

Ме дась вөлі не сөмын вомөс ыджыд томанөн игнавны, некодкөд да некор та йылысь не сёрнитны, но көть өні чечыштны ваө да варчыны Эжва мөдарөдз, тшөктас кө Саня. А сійө сулаліс ме водзын, видзөдїс сюся да, кажитчө, виччысис мясянь кутшөмкө торъя кыв. И ме лэптї киөс, чабыртї кулакөс да көсйыси:

— Мед менө сюра өш люкалас, вөрын ош сөяс, мед ме му пырыс муна, коркө кө кодлыкө калькнита вом да висьтала та йылысь...

Кынев топөдліс менсьым киөс, вынсьыс тракнитіс да шуис:

— Лоам Натти Бампо кодьөсь!

— Код кодьөсь?— выльысь эг гөгөрво ме.

— Тэ он на төд сы йылысь... Америкаын овлөма сэтшөм писатель Фенимор Купер. Ме сылысь лыдди кык книга: «Зверобой» да «Последний из мокиган». Ок, книгаясы! Коля Тюрнин меным судзөдліс. Дядьыслөн сэтшөм книгаясы! Да ещө доктор Розановлөн. Пиыс сылөн мекөд жө велөдчө. Заводитан лыддыны тайө

книгаяссö да дугдыны он вермы. Сійö книгаас и гижсьö Натти Бампо йывсьыд. Кымын ним сьлөн! Соколиный Глаз. Кожаный Чулок. И ещö сьлөн. медся верной друг — Чингачук. Кутшöм збойöсь найö кыкнанны! Гöльясöс дорйöны. Некодусь оз повны.

— А мыйла сійö книгасö меным тшöтш эн вайлы?

— Ещö дай! Оз на öд сетны! Локтан воö, гашкö, верма корлыны, бурджыка тöдмасы да...

Гашкö эськö мыйсö на меным эз висьтавлы Саня сійö луннас, но воисны миянöс корсьысьяс. Воштöмаöсь! Некор налөн нинöм оз артмы, ми кö Санякöд здук жежлö саялам. А кутшöм окота вöли меным ещö кывзыштны Саняöс. Кымын книга нин сійö удитöма лыддыны карад. А миян школаын книгаыд этша. Быдөнöс нин ме удити кыкысь лыддыны.

Нельöд глава

БИКИНЬ ПЕТÖ ТЫШÖ

Регыд Бикинй йылысь сикт пасьтаын мöдисны тöдны.

Лои тайö тадзи. Сиктын кодкö ёна пуис да вузавлис самöкур. И мый кöть эз корсьны волисполкомын уджалысьяс, некыз эз вермыны кутны. Тыдалö, кодкö зэв сюся вöчис. Шобсисны уна пывсянын, комсомолецьяс керкаысь керкаö ветлисны, и некысь сер ни пас налы эз сюр.

таліс, мый сылөн батыс кодкөлун локтёма зэв код да заводитёма ошйысьны, кызди сійөс корлёмабсь гөститны Кос шор йылө. И сэни сійөс гөститөдөма Егор Педөсся. «Тэ нин Педөссяяс ордын мөдін курасьны!— серавны мөдөма отеч Никодим вылын Колялөн мамыс.— Оз нин сэсся некысь сюр». Батюшкоыд и висьталас: Кос шор йылас пө, өти керөс бокрын, вөчөмабсь ыджыд чом, и сэни кык ыджыд дозйын Педөсся дугдывтөг пуө самөкур. Медасьөма пө Яран Павеллы самөкурсө пуны. Ачыс жө пө Педөссяыс и вузавлө, а деньгасө сэсся Пашыслы сетө.

Та йылысь ми висьталім Афанасий Васильевичлы.

— Пасибө тиянлы,— ошкис сійө мянөс.— Зэв бур юөр вайид. Ти — настоящөй пионеръяс...

Мөд луннас исполкомсянь кайөмабсь йөз, кутөмабсь Педөссяөс места вылас. Струментъяссө пыззьөмабсь, самөкурсө кык ыджыд туисысь кисьтөмабсь. Педөсся став юрсисө муртса абу нетшкөма: рөзөритид пө дзикөдз. Но көть кызди эз юасьны, пыр долис ассьыс: некод менө эз медав, ассьым пуи.

— Кытысь тэныд сы мында пыззьыс?— топөдисны Педөссяөс.

— Деньга вылад, майбыр, быдтор сюрас...

Корлөмабсь тшөтш и отеч Никодимөс, но и сійө дорйөма Педөссяөс: эг пө нинөм кывлы, а адззывны — адззылі пө.

Вот та йылысь и петіс «Югид туй» газетын неыджыд гижөдтор. Сэни висьтавсис, кызди керөсдорса пионеръяс отсалісны кутны самөкур пуысьбөс, но медся мыжачыс — важ купеч Яран Паш — коли эрдөдтөг. Мед пө уездысь волас милиционер да бура төдмалас ставсө.

А заметка улас кырымпас: «БИКИНЬ».

Сёрниыд сиктын кыптис! Сэки сиктад газетыд зэв на этша воис, нель-вит сөмын. Корсисны газетсө быдөн, лыддисны, кийсь киё сеталисны. Онөдз газетад некор на эз гижлыны Керөсдор йылысь. И вот, сийö нималис Коми му пасьталаын.

— Кодкө зэв сюсь морт гижöма,— ошкис мяян сосед Варö Иван.— Сидзи и колö Яран Пашыслы. Зэв нин нырсö вылын кутлис. Оз вöли сибöд некодöс ас динас, он кө копыртчыв муөдз. Öнi нырыс неуна лэччыштис, но пыр на кыйöдчö йöз тшöт вылö олыштны... Некедз оз көсйы гөгөрвоны: сылөн ыджыдалöмлы воис пом.. Молодеч, мися, гижысьыс. Видзöд, кутшöм шыльыда артмöма! Дзик Нёбдинса Витторлөн моз...

Дерт, Бикиньлөн гижöдыс эз на вермы лоны Нёбдинса Витторлөн гижöд кодь. Иван дядь тайöс прöстö содтыштис. Но öтитор вöли гөгөрвоана: сиктын эм асланым селькор. Ми Санякөд ас улысь кокъяснымöс эг кылöй, и дерт, эг ошйысьöй, кодi сэтшöм Бикиньыс. Тайö вöли мяян кык друглөн гусятор. Та йылысь ми эг висьталöй весиг Лизалы.

— Кутшöм тi пионерьяс, он кө тöдöй,— көрыштлис сийö нырсö да бергöдчис мөдарö, кор ми лэдзчысым нинöм тöдтöмьяс улö сылөн юалöм бöрын.

— Тэ со пионерка да он жö тöд,— чушкышти ме.

— А ме тöдмала,— збоялис Лиза.— Менам вежань почта вылын уджалö. Юала сылысь, кодi газетас письмöяссö ысталö...

Ми Санякөд повзим: Лизаыд и збылысь вермас тöдмавны. Сидзкө, колö лоны сюсьджыкөн.

Челядь дырйныд гожöмыд öдийö кольö, он и казавлы. Кажитчö, тöрыт на йиа ваын таво вылö первойысь купайтчин, а видзöдан да — Эжваыд заводитöма нин бөр

ыркавны. Зато кисьмасны вотосьяс: первой оз, сэсся мырпом да чөд. Гөрдөдас пув. Мөдасны кыпөдчавны мича гобьяс.

Турун пуктан кадө ми Санякөд мыйкө дыра кежлө торъявлім. Эжвайд кузь да паськыд, видзьясид кодлөн кодарын — катыдын и кывтыдын, тала берегын и мөд-лапөлын. А челядьтөг страдайд эз вөвлы: юр кыскавны, юр туй куртны, зорөд таявны — быдтор вылө чслөй-мылім. Но мыйөн уджъяс топавлісны, бөр өтлаасьлім. Вөчим отряднөй сбор. Оні ми чукөртчывлім клубын нин. Самөкур пуысьтө кутны отсалөм бөрын клуб өдзөс миянлы восьтісны.

Өти рытгорулын ми, зонпоснияс, пукалім клубын да сёрнитім, кызди матыса лунъясө вөчны отрядөн орчча сиктө поход. Ми некымынысь нин тайөс вөчлім: өтвы-лысь ворсім орчча сиктса пионеръяскөд, нуөдім беседа-яс. Отрядлөн вөлі нин знамя, барабан. Челядь миян дінө пыр локтісны унджык. Весиг мамъяс казялісны: пионеръяс оз сетчыны лөк вөчөм вылө. Мөдарө, пыр мыйкө выльтор да выльтор нуөдөны.

Миянлысь сёрнинымөс торкис Лизалөн ичөтджык чойыс. Сійө пырис котөрөн, пошиктө быдсөн, да вись-таліс: сылысь чойсө нөйтөмаөсь.

— Коді? Көні? — мөдім юасыны ми.

— Ме ог төд... Асывнас катөдіс нывъясөс вотчыны давиө, а гортө локтіс өні тыртөм туисөн... Зонъяс абу лэдзөмаөсь вотчынысө. Тшөктіс висьтавны тіянлы...

— Кодъяс нөйтөмаөсь? — эг лэдзчысьөй ми.

— Мунөй да асьныд юасьөй...

Ми котөртім Лиза ордө. Сійө куйліс вольпась вы-лын. Став сертиыс төдчис: неважөн на бөрдөма. Весиг синъясыс пыктөмаөсь, гөрдөсь.

Лиза миянлы висьталіс: асывнас пө ныв чукөр 19

кайим вотчыны Қос шор пөлөн. Но эгө на пө удитой
вөрөдзис воны, уськөдчисны некымын зонпосни.

— Огө лэдзө мян даыйн вотчыны,— шуисны
найө.— Тайө вөрыс — катыдпомсаяслөн...

— А ме нө коді! Абу катыдпомса?— юалі ме.

— Вөлін катыдпомса, а өні абу: пионерад пырөмөн
тэ вуджин мөдарө...

Ме эг повзьи, мөдөдчи водзө. «А, тэ тадзи!»— горөдіс
өти детинка да зургис меным морөсө. Ме и уси. Усьөм
бөрын кодкө ещө чужийс. А кодкө горөдіс: «Вот тэныд
пионералөмсьыд!» Нывкаяс повзисны да сюв-сяв разалісны,
коді кытчө...

Ми кывзім Лизалысь висьталөмсө да эг төдөй, мый
сылы шуны. Ставыс тайө вөлі зэв виччысьтөмтор. Ты-
довтчис и мөдтор: Лиза эз висьтав уськөдчылысьяслысь
нимьяссө.

— Ог төд...— долис сійө ассьыс, и эз көсйы весиг
видзөдлыны мян вылө.

— Кыдзи он төд?— шензим ми.— Аддзылін өд
асьнысө найөс?

— Аддзылі...

— И мукөдыс аддзылісны?

— Ог төд... Найө ылынөсь вөліны...

Ми гөгөрвоим: Лиза оз көсйы висьтавны. Дерт,
көнкө, полө. А гашкө и повзөдлөмаөсь.

— Веськыда висьтав: он лысьт!— Лизасө топөдіс
Саня.— А тэ кө он төд — ме төда, көть и эг вөв сәні.
Ставныс катыдпомсаяс: Ольош, Максим, Мишө, Онись...
Мый нө, эз найө вөвны?

Лиза чөв оліс.

Мый вөчны? Ланьтны? Сәки найө дзыкөдз вельмас-
ны, нывьяс оз кутны лысьтны улича вылө керкаысь
петавны, непөштө вөрө мунны. Ми өд төдім: тайө детин-

каясыскөд другасис Зөсим. Ньобалис налы кооператив-
ной лавкаысь көлач, преник. Гөститөдліс найөс. Позис
стөча шуны: нывкаясөс повзьөдны ышөдіс катыдпомса
детинкаясөс Зөся. Ми гөгөрвоим и Лизалысь полөмсө.

— Ладнө!— чорыда шуис Саня.— Ми ещө видзөд-
лам на, коді кодөс...

Челядьдырся гажа вояс! Вежөрыд сэки ичөт, сюсь-
луныд оз тырмы. Миянлы и асланым пионералөмным
сэки кажитчыліс сөмын ворсөмөн. И тайө збылысь
вөлі ворсөм да гажөдчөм сэки. Сөмын выль ногөн: эз
сідзи, кызди сы кадөдз ворслісны сиктса челядь. Кы-
мынысь ми сикт кузя прөйдитлім гөрд флагөн барабан
шы улын. Кажитчө, сэки кокъясыд асьныс нуоны, мудз-
өм он төд, көть лунтыр стройөн восьлав. Кокъясыд
сідзи и брунакылөны, кор кылан Санялысь гөлөссө:
«Ать-два», «Ать-два»! Ми быттөкө вөлім том салдатъ-
яс. Ми и лыддим асьнымөс салдатъясөн.

Сэсся ми клубын петкөдлім асьыным первой спек-
такль. Пьесасө бөрийим Нөбдинса Виторлысь «Шонді
петігөн дзоридз косьмис». Ме ворсі Иванлысь рольсө,
Саня— Григорийлысь. Онөдз помнита, кызди ме нюж-
йөдлөмөн лыдди: «Крестя-нин па-шет, окот-ник стре-
ля-ет, с-ест-ра пла-чет». Оз вун и сійө сценаыс, кор
Иван лыддьө вокыслысь письмөсө. Письмөыслысь кывъ-
яссө онөдз помнита: «Любезный брат мой, Григорий
Васильевич Сигеров, здравствуйте! Это письмо от бра-
та вашего Ивана Васильевича Сигерова. Во-первых
строках сего письма я пишу от господа бога доброго
здравия и сякого благополучия делаю рук ваших, того
и вам желаю». А кор спектакль помланьыс шуа вөлі
кулысь воклы: «Кувсин, муса вокөй! Шонді петігөн,
зарни дзоридзөй, косьмин!.. Кывзы, Гришукөй! Мый
понда тэ косьмин, сійө некор оз кус!.. Ті өзтінныд, ми

паськōдам. Узь долыда, уджалысь йōз вōсна тōждысь-
ысьōй!.. Бурōн казътыласны найō тәнō!»—и залын пука-
лысьяс тайō кывъяссō кывзигōн унаōн чышкалисны син-
ванысō. Кōть спектакльсō ворсīm куш челядь, быдōнлы
йиджис сьōлōмōдзис. Саняōс спектакль бōрас ми вель
дыр сēsся шуим Гриша Сигеровōн.

Спектакльбōрся войсō ми Санякōд пōшти эг узьōй.
Пырим мян сарайн вонйō да дыр-дыр сērнитīm.

— Ме лоа писательōн либō артистōн!— сьōлōмсянь-
ыс висътавліс меным Саня.— Кута гижны мича пьесаяс,
сēsся ачым жō и ворса главнōй рольсō, Нēбдинса Вит-
тор моз...

— Землемернад он нин ло?— тōждысьōмōн юалі ме.
Меным мыйлакō зэв ēна коліс, мед эськō Саня лоас
землемерōн.

Саня бура дыр чōв оліс. Тыдалō, думайтīs, и сēsся
вōлишти шуис:

— И землемерōн лоа. Вот аддзылан, мырддям на
ми Яран Пашлысь бур муяссō... А писательнад да
артистнад быдōн вермас лоны: тэ и ме, вежōрыд да
сямыд мед сōмын вōлі...

Меным унатор вōлі гōгөрвотōм Саня сērниысь:
кызди, шуам, позьō лоны писательōн да гижны книга-
яс? Кызди позьō мырддъыны му сійō жō отеч Никодим-
лысь либō Яран Павеллысь?

— Тэныд карō жō колō велōдчыны мунны,— шуис
меным Саня.

Коді оз кōсйы велōдчыны! Но сэки эз на быдōнōс
велōдны, дай эз быдōн вермы велōдчынысō. Зэв шудаōн
колō лоны, медым велōдчыны!

— А ме кута велōдчыны!— мечтайтīs Саня.— Муна
Москваō, лоа учēнōйōн. Кута гижны книгаяс, велōдны
йōзōс бура да гажаа овны...

Тайо вой бӱрас ми Санякӱд бытбӱкӱ лоим ещӱ матынджыкӱсь. И ми сетӱм ӱта-мӱдлы чорыд кыв: пыр лоны другьясӱн.

Важӱн петӱс шондӱ да югьялис сарай сайын, а ми пыр на варовитӱм. Коркӱ нин сӱмын асьядорыс ойбыр-тыштлӱм неуна.

Витӱд глава

МИ КОРСЯМ ЗАРНИ

Коля Тюрнинӱс гортсеаясыс шуӱмаӱсь кадысь водз мӱдӱдны карӱ дядыс ордӱ. Тайӱс, дерт, вӱчисны сы вӱсна, медым Коляӱс торйӱдны миян дӱнысь. Отеч Никодимлы ӱна эз во сӱлӱм вылас пиыслӱн пернатӱм пионерьяс дӱнӱ матыстчӱмыс. Йӱзсяньыс абу лӱсьыд. Сӱдз нин та йылысь ӱна сӱрнитӱсны сикт кузялаын. Быдӱн кӱсийӱны тӱдны, мый вӱчас батюшко аслас ыла-лӱм пиыскӱд.

Афанасий Васильевич миянлы висьталӱс: Колялӱн батыс кыкысь нин волӱма сы ордӱ, тшӱктӱма киритны пионерысь. Оз пӱ лӱсяв, медым сылӱн пиыс котралӱс енмӱс ӱтдортысьяскӱд.

Но нинӱм эз отсав: Коля миянысь эз ӱтдортчы.

И колӱ вӱлӱ аддзыны, кыдзи майшасисны сиктса пӱчӱяс, кор поплӱн пиыс мӱдӱс ветлыны гӱрд галстукӱн.

— Босьтас эськӱ мед батюшконым крепыдджык

тасма да жбоньодас бур пёт,— шуалисны кодсюрё.— Сэки эськё гёрд галстуксё шыбитас.

Но эз вёв сэтшөм Коля Тюрнин.

Отчyd Коля котёртис миян динё да висьталіс карё мөдөдөм йылысь. Сылөн весиг синваыс доршасис.

— Но ті менё лыддьёй пионерён,— корис Коля.— Эн киритёй. Ме көсья лоны тiянкөд. Карад ме гижся жё пионерас, мед көть мый шуасны гортын. Ассьым галстуксё тшөтш босьта и...

— Ладнө,— сөгласитчис Саня.— А кор мунан карас?

— Аски пароход кутас лэччыны. Мама карё мунө, и менё тшөтш аскөдыс босьтө. Нарошнө ставсө тадзи вөчөны. Но ме веськыда шуа: лоа тiянкөд!

Меным весиг жаль лои сійө: со өд попыд кутшөм, оз лэдз пиыслы и гёрд галстук новлыны. «А мый виччысьны попыдлысь?— думышти ме.— Попыд — поп и эм. Велалөма ылөдлыны йөзөс».

Коля мыйкө эз тэрмась миян дiнысь гортас мунны, видзөдльвліс Саня вылө. Сійө казяліс тайөс.

— Мый ещө тэнад? Висьтав да котёрт гортад, мед выльысь оз тасмаавны...

Коля гөрдөдіс. Пионеръяс төдісны нин: батыс сійөс абу нин өтчyd тасмаавлөма.

Тюрнин нуөдіс менө да Саняөс бокө.

— Помнитад төндзия сёрнитө?— гөгөр видзөдлөм бөрын юалис сэссия.— Яран Павелыдлөн зарни йывссыд...

— Но?— виччысис Саня.

— Ме кывлі сылысь папкөд сёрни... Ошйысис... Төдад сылысь скөт картасө? Гидняс пө, медся пыді пельөсас гуалөма. Ещө Пашыс шуис: идравны колө ылөджык, быдторсө пө öні позьö виччысьны...

— Он сөр?— стрөга юалис Саня.

— Честнөй пионерскөй. Ачым кывлі. Ме кухняын



вөлі, а найö сёрнитісны комнатаын. Дерт, көнкө, эз чытны, мый ме кывлі...

— О, мянлы эськө сійö зарнисö!— синъясыс öйисны Санялөн.

— Мый сійөн ми мöдам вöчны?— юалі ме, быттö зарниис вөлі мян ордын нин.

— Зарнинас?— Саня бергöдчис мелань.— Зарни вылад быдтор позьö ньöбны. Бать висьталö: зарни вылад пö Сöветскöй властьыд кöрт плугъяс сетас, вартан машинаяс. Комунатö пö котыртам да быдтор ковмас.

Та вылын и помасис сэки мян сёрниным. Қоля Тюрнин мөд луннас муніс карö, а ми кольчим ебчы ассыным пионерскöй делöяс. Но гидня пельöсö дзёбм

зарни йылысь дум эз петав юрсьыным. Унаысь сёрнит-
лім ас костаным, кызди эськө судзодны. И дзик некод-
лы эг висьталой сы йылысь, ставсө көсийим вочны асла-
ным киясөн...

Яран Павеллөн керкаыс Вичкодорын медся ыджыд.
Кык судта. Гожомнас олісны вылыс судтаас, төвнас
лэччылісны улиас. Керка саяс скөт карта. Кык судта жө.
Улиас оліс скөт — мөсьяс душ куим-нель, гашкө комын
ыж, вөвъяс. Вылиас — турун сарай. Кузь звөз кузя сэтчө
турун додьяссө катлісны төвбыд. Абу өти вевт улын
керкаыскөд скөт картаыс, мукөдъяслөн моз, а торъя.
Эз көйы Яран Паш сиктын лоны мукөдъяс кодьөн,
көсийс овны карсаяс моз.

Ыджыд овмөсыс Пашлөн. Война воясад скөттө не-
уна чинтыштліс, но бөръя воясас содтіс нин пөшти важ-
өдзыс. Кывсьыліс: Паш пө көйө магазин асьыс выль-
ысь восьтыны. Но сиктын буретш сэки котыртчис ко-
оператив, торкис сылысь планъяссө. А то эськө бара
на купеч пиён вермис лоны миян Зөся. Вот ми и шуим
Санякөд пыравны Яран Пашлөн гидняд.

Гожомнад вөвъясыд пырджык лудынөсь. Гидняыд,
төдөмысь, тыртөм. Өти рытө ми босьтім көрт зыр,
матыстчим карта дорад. Гөгөр шы ни төв. Кыліс, кызди
пошиктөны-рөмидзтөны картаын мөсьяс, шыалөны
ыжъяс. Калькнитім гидня өдзөссө, пырим. Но ми некыз
эг вермө думыштны, мый Яран Пашлөн ыджыд, лөк
Бускоыс гортас. Ми луннас аддзылім, кызди сійө вөт-
чис көзяиныс бөрся, лэччис Эжва дорө. Чайтім, вой-
нас Яран Паш оз ло гортас, и понйыс оз ло. А мыйөн ми
пырим гидняд, сараяс кыліс понлөн лөкысь увтчөм.

— Пет да котөрт!— тшөктіс меным Саня, и мыйкө
26 зургис меным киө.

— А тэ?

— Мун, өдйөджык!— мөдүс тшөктіс Саня.

Кодкө, кылө, петіс керкаыс, чукөстіс Бускоос. Но пон эз ланьт, ещө лёкыс мөдіс увтчыны. Ме уськөдчи өдзөслань, вирскөбті-петі өдзөс сайө. Ачым ог помнит, кызди лои керка сайын.

Куті кывзысьны. Гидня өдзөс дорын кылісны гөлөсьяс. Окота вөлі матыстчывны, видзөдлыны, мый сәні менам другкөд. Но места вылыс вөрзыны эг лысьт...

Мөд луннас Яран Паш аслас кокөн локтіс Афанасий Васильевич ордө норасыны пиыс вылө. Киас вайис көрт зыр, кодөс тэрмасигад төрыт миян кольсьөма гидняд. Вөлөмкө, зырсө зургөма меным Саня, но ме эг гөгөрво сьөрыс петкөдны сійөс.

— Шойчы-шонтыс, Павел Игнатъевич,— шуис Афанасий Васильевич виччысьтөм гөстьлы да видзөдліс миянлань. Гөгөрвоис: миян вылө норасыны локтіс. Ми өд висьталім нин сылы, кызди пыралім йөз гидняө да мый сәс артмис.

— Шойчыны, пөжалуй, лоө,— шуис кортөм гөсть да матыстчис пызан помлань. Сійө кучик картуза, югыд көзырок увсьыс сьөд синъясыс югъялөны. Паш чөвтліс синъяссө ми вылө.

— Мед пукалөны,— шуис Санялөн батыс.

— На вылө норасыны локті,— юрнас миянлань довкнитіс Паш.— Вичкодорсянь со локті. Дөзмөдчыны мөдісны том йөзыд, Афанасий Васильевич.

— Дөзмөдчыны?— синсө читкыртыштліс Афанасий Васильевич.— Том йөзыд век сэтшөмөсь. И ми том дырйиыд...

— Миян дөзмөдчөмыд некодөс эз дойдлыв... Йөз овмөсө ми нырнымөс эг суйлөй,— тэрмасьтөг, лабутнөя кайтіс Яран Павел.— Ме со зыр вайи. Гашкө,

төдса? Төрыт менам гидняө, Афанасий Васильевич, тэнад пиыд пыралөма... Ме ачым эг вөв гортын, эг аддзыв и ог төд. Пиёй висьталіс. Кутөмаөсь питө,—и бара юрнас довкнитіс миянлань.— А мөдыс пышйөма. Мый налы менам гидняысь колө? Сы вылө велөдөны гөрд галстукаяссө?

Афанасий Васильевич выльысь видзөдліс миян вылө, шуис:

— Ог вермы гөгөрвоны, мый корсисны тэнад гидняысь... Клад тэнад сэтчө абу гуалөма. Эм кө — көнкө ылынджык, төдөмысь. Вөвъяс миянладорын оз жө гусявлыны. Гашкө, гиднясяныд көсйисны гөбөчад пыравны, нөк кашник гусявны? Мый вылө сэсся сэтчө зырыйс?

— Тэ эн серав, Васильевич... Пионеръясөн ещө шусьөны! Бур вылө, вөлөмкө, сэні велөдөны! Талун гидняө пырасны, аски жытниктө ректасны, а сэсся и узигкостаыд голятө вундасны. Газетъясө гижны кужөны, а асьнысө оз аддзыны... Кысь сэсся мөдторсө виччысян: власть ни пөрадок эз мөд лоны. Быдөн көзяин, весиг челядь. Со и артмө...

— Мый артмө?

— Шуа тай: коді мый көсйө, сійөс и вөчө. Кутысь — некод. Уваженньө — некодлы жө. Сійөн и быд зырымбеддыс... Гачыс розя, гөгөр вашъялө, видзөдны яндзим, а кывзан да — сійө и мортыс...

— Вот мый, Павел Игнатъевич! — батъ сувтіс, лөсьөдыштіс тыртөм дөрөм соссө.— Вай ог мөдөй та йылысь. Ми өта-мөдөс төдам, и миянлы дзик нинөмла. А мый тайө кык том мортыс пыралөмаөсь тэнад гидняө — збыль. И мыжаөсь таысь. Меным найө асьныс висьтасисны нин. И төдан мыйла пыралөмаөсь? Тэнсьыд зарни клад корсьны. Қывлөмаөсь — гидняад пө гуалөмыд...

— Зарни? Менам?— синъяссö паськөдіс Яран Паш.— Волöй, кодйöй ставсö, абу кө дыш. А детинкаястö накажит — тэ бать... Шуа тай — найö думыштасны да мöдысь жытникö пырасны.

— Оз пырны! А кор ковмас — пырам. И зарнитö аслад киöн миянлы ваян!

— Ме? Зарни? Аслам киöн?— скöрмис Паш, сувтіс да кыкысь воськовтöмөн петіс керкаысь.

— Эк, ті! Клад корсысыяс!— гораа серöктіс Афанасий Васильевич. Сэсся локтіс Саня дінö, малыштіс сійöс юрси кузяыс.— Мый морла вöлі колö тиянлы Паш гидняас пырны? Вöчöй ассыныд уджтö, кыскöй ас дінад унджык челядьöс, а Яран Пашкөд ми кызкө асьным нин. А öні ті повзьөдід сійöс: пыдö дзебас зарнитö,— Афанасий Васильевич прöйдитіс комната кузя, босьте киас Яран Пашöн кольöм зыр, бергөдлыштіс сійöс да бара гораа серöктіс.— Но, ладнö! Оз пышйы миянысь и Яран Паш! Сыланьö делöясыс матыстчöны, другъяс! Лöсьөдчöй!

Квайтöд глава

БИКИНЬ МИЯНКÖД

Он тай вермы тöдны, кызди мукöд дырйи олöмыд бергөдчывлö. Кöсьян öти ног, а сійö песовтчас да дасьтас сэтшöмтор, мый некыз он виччысь.

Керөсдорö быд волігөн öні ме быть кежавла сиктса кладбище вылö. Сэні куйлö менам бать, куйлö Афана-

сий Васильевич. Сэні жö куйлö и менам друг Саня Кынев.

Кыдзи тайö лои? Сьöкыд висьтавны. Но кык гижöд негырысь обелискьяс вылын пыр менам син водзынöсь:

**Афанасий Васильевич
Кынев**

(1890—1951)

**Александр Афанасьевич
Кынев (БИКИНЬ)**

(1910—1925)

Сийö вунöдлытöм шуштöм лунас, кор ми воштим асыным другнымöс да ёртнымöс, заводитчис дзык мукöд луньяс моз жö: лöня, бура. Мича асывводзын сиктысь унаöн вуджисны мöдлапöлö вотчыны: кодi тшакла, кодi вотöсла.

Лун шöр бöрын асыв-войсянь кыпöдчис ыджыд кымöр, здукöн тупкис став енэжсö. Прамöй зэр эз ло, зато кыптис төв. Эжва серöссис, гыяс ыдждiсны да ыдждiсны, и мöдiсны патурликасьны пывсян гырся веж гыяс. Төв пыр ыдждiс.

Ми Санякöд мöдлапöлын жö вöлим. Асывводзнас вуджлим ельдöг корсьны. Эз и дыр ковмы ветлöдлыны — веськалим ельдöгаинö, здукöн дозьяснымöс тыртим. Верим эськö пыр жö гортлань вуджны, но вöйталим берег дорсянь подольникьяс.

Ми казаявлим, кыдзи миянысь катыдынджык гортлань вуджисны öти пыжөн. Тыдалö, бöжалысьыс бур вöли: йöз тыра пыж, кöть и унаысь вошли гыяс костö, матыстчис горт береглань.

Сэсся аддзим, кыдзи мöд пыжа вöрзьöдчис берег дорысь. Сэни вöли и миян Лиза. Пыжын пукалысь ныв-бабаяс чöвтiсны пернапасьяс. Асьныс тiралöны полöмысла, а петöны гыа ва шöрö. Но, мöдарö кö, быть

вудж: нывбабаясöс гортаныс удж виччысьö, челядь.

Неылын мянсянь вöли ещö öти пыж. Сы гөгөр бергалісны Зöся, Яран Пашлөн пиыс, да сылөн пырся другьясыс. Быдөн ружьеаöсь. Дерт, көнкө, уткаяс бөр-ся вötлысьны ветлöмаöсь.

Нывбабаясөн тыра пыж ылыстчис да ылыстчис ва шөрлань. Но, думайтам, вуджасны бура.

И друг пыж ни йöз эз мöдны тыдавны.

Саня уськөдчис Зöсялань, горöдіс:

— Тян пыжныд ыджыджык! Удитам отсög вылö петны!

— Мед эз збоявны!— веськодя вочавидзис Зöся.

— Тэ — мый? Збыльысь?— скөрмис Саня.

— Асладөн пет, юрид кө сэтшöм донтöм!— пиньяс-сö жерйöдліс Зöся, а сылөн другьясыс орччөн сулалі-сны, сералісны жö.

Код тöдас, кытысь Санялөн чукөрмис выныс, кыптис збойлуныс. Дерт, көнкө, скөрмис Зöсялөн серам вылö, уськөдчис асланым пыжлань.

— Öдйöджык!— горöдіс меным да чеччыштис пыжö.

Эз весиг видзöдльыс бөрвыс, быттьö эз и думыштылы, мый ми вермам повзыны да не вötчыны сы бөрся.

— Сынöй, а ме кута бöжавны!— командуйтис Саня. Мый вынысь ми пондiм сынны.

Ва шöрын пöгиб воысьястö казялöмаöсь и катыд-помсаяс. Мöдар берегсянь петісны паныд ыджыд пыжөн. Вöйысьяслөн пыжныс, вöлөмкө, абу путкыльтчö-ма, а сöмын тырыс гумовтöма васö.

Қор ми Санякөд матыстчим пыж дінас, Лиза да öги нывбаба вöліны ортсыынöсь на, муртса шашаритчö-маöсь пыж дорышас турдöм-кыномöм чуныяснаныс. Код тöдас, кызди да мыйла сэнi найö лöмаöсь. Саня кутіс Лизаöс шошаöдыс да кыкис мян пыжö, а мöд ныв-

бабаыд лэдзис чуньяссö пыж дорсьыд да дзуммуни-
воши ваö. Тайö ставыс лои öти здукöн. Мый вöчны?
Дыр думайтны вöли некор, и Саня чеччыштис ваад ныв-
баба бöрсяыд да воши. Сэссия петкöдчылис здук кежлö,
лолыштис ыджыда, видзöдлис гөгөр да бара воши ваö...
Коли здук-мöд. Ни Саня, ни нывбабаыд эз тыдовтчыв-
ны ылын ни матын.

Саня Кыневлөн шойыс сюри Эжва кывтыдысь куим
лун мысти, нывбабаыслөн — сёрöнджык. Саня кабы-
рын вöли и нывбабалөн чышъяныс.

Тадзи ори олöмыс Бикинълөн!

* * *

Саня Кынев! Миян ичöтдырся друг!.. Менам сьöлö-
мын тэ пыр сэтшöм, кутшöмөн вöвлін аслад дженьыдик
нэмын: авъя, шань, повтöм, мортöс радейтысь.

Саня кувсян воö Керöсдорын лоины уна вьльторъяс.
Ме да Лиза Казакова арнас муним велöдчыны карö.
Миян бöрся сэссия вöтчисны и мукöдъяс.

Вьль том йöз талун быдмöны Керöсдорын: авъяöсь
да суюсьöсь. Олöны талунъя кыпыд да гажа олöмөн. Но
Керöсдорö волігөн ме аддзывля, кызди гөрд галстукъяса
нывкаяс да зонкаяс быд гожöмын вежлалöны мича
дзоридзьяс Саня Кынев гу ылын.

Сідзкö, тэ и накöд, миян Бикинь!

Для среднего школьного возраста

Иван Васильевич Изъюров

НАШ БИКИНЬ

(на коми языке)

Художник С. Добряков

* * *

Редактор *С. Морозов*

Худож. редактор *М. Безносков*

Техн. редактор *А. Вишнева*

Корректор *А. Надуткина*

Сдано в набор 14 XII-1966 г. Подписано к печати
19 I-1967 г. Формат 70×108^{1/32}. Бумага № 2.
0,5 бум. л., 1,37 печ. л. (Уч.-изд. л. 1,3).
Тираж 2000. Заказ № 7672. Ц00421. Цена 4 коп.
Коми книжное издательство. Дом печати.

* * *

г. Сыктывкар, Республиканская типография
Управления по печати при Совете Министров
Коми АССР.

